

ՀՀ ԿԱ պետական եկամուտների կոմիտե

Հարկային և մաքսային մարմինների գանգատարկման հանձնաժողով

Ո Ր Ո Շ ՈՒ Մ 14/3

21 հունիսի 2016թ.

Քննարկվեց «Հայկական Սահմանադրական Իրավապաշտպան Կենտրոն» ՀԿ գանգատը ՀՀ ԿԱ ՊԵԿ աշխատակազմի իրավաբանական վարչության պետի 03.05.2016թ-ի թիվ 318416/09 որոշման դեմ:

«Հայկական Սահմանադրական Իրավապաշտպան Կենտրոն» ՀԿ գանգատում բերված փաստարկները.

ՀՀ ԿԱ ՊԵԿ աշխատակազմի իրավաբանական վարչության պետը, 2016թ. մայիսի 03-ին որոշել է վարչական տույժ կիրառել՝ նշանակելով տուգանք քսան հազար դրամի չափով, իբր «Հայկական Սահմանադրական Իրավապաշտպան Կենտրոն» ՀԿ (այսուհետ նաև՝ Կազմակերպություն) տնօրենի կողմից 2016թ. փետրվարի եկամտային հարկի հաշվետվությունը չներկայացնելու համար:

Որոշումն անհիմն և անարդարացի է, կայացվել է առանց բազմակողմանի քննության, անտեսելով ներկայացված փաստաթղթերը և բացատրությունը: Կազմակերպությունը ժամանակին ներկայացրել է հաշվետվությունը:

«Հարկերի մասին» ՀՀ օրենքի 15-րդ հոդվածի համաձայն՝ հարկ վճարողը պարտավոր է հաշվետվությունները ներկայացնել հարկային մարմին սահմանված ժամկետում էլեկտրոնային եղանակով կամ ուղարկել փոստով կամ հանձնել ըստ պատկանելության:

2016թ. փետրվարի եկամտային հարկի հաշվարկը ներկայացվել է փոստով, իսկ պատճենը հանձնվել է Վանաձորի հարկային տեսչություն, առձեռն, 2016.03.16-ի թիվ Ը/11 գրությանը կից, քանի որ հաշվետվությունների ներկայացման էլեկտրոնային համակարգը 2015թ. դեկտեմբերից թույլ չէր տալիս առցանց ներկայացնել հաշվարկները:

Կազմակերպությունը չի խուսափել հաշվետվություն ներկայացնելուց: Ավելին, 2016թ. հունվարի 19-ի ՀՀ Ֆինանսների նախարարին ուղղված գրությամբ խնդրվել է տեխնիկապես ակտիվացնել/պահպանել ARX Cosign համակարգի սպասարկումը և հնարավորություն տալ էլեկտրոնային ստորագրություն դնել առցանց համակարգով: Այնուհետև, նախարարության 2016թ. փետրվարի 08-ի գրությամբ արված առաջարկով կազմակերպությունը դիմել է «ԷԿԵՆԳ» ՓԲԸ-ին, խնդրելով երկարաձգել էլեկտրոնային թվային ստորագրության հավաստագրի գործողության ժամկետը և դրա համար 2015թ. դեկտեմբերի 18-ի թիվ 97 վճարային հանձնարարականով «ԷԿԵՆԳ» ՓԲԸ-ին է փոխանցվել 10000 դրամ: Կազմակերպությունը մեղք չունի, որ ARX Cosign համակարգը չի սպասարկվում:

Շարադրվածի հիման վրա գանգատաբերը խնդրում է վերացնել ՀՀ ԿԱ ՊԵԿ աշխատակազմի իրավաբանական վարչության պետի 03.05.2016թ-ի թիվ 318416/09 որոշումը:

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովի եզրակացությունը.

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովը (այսուհետ նաև Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության:

Քննարկման ընթացքում նշվեց, որ ՀՀ ԿԱ ՊԵԿ աշխատակազմի իրավաբանական վարչության պետը, քննելով 03.05.2016թ. թիվ 614/09 վարչական իրավախախտման վերաբերյալ արձանագրությունը և կից նյութերը պարզել է, որ «Հայկական Սահմանադրական Իրավապաշտպան Կենտրոն» ՀԿ տնօրեն Գևորգ Մանուկյանը «Եկամտային հարկի մասին» ՀՀ օրենքի 13-րդ հոդվածի 2-րդ մասով սահմանված ժամկետում չի ներկայացրել 2016թ. փետրվար ամսվա եկամտային հարկի և սոցիալական վճարի ամսական ամփոփ հաշվարկը: Նկատի ունենալով, որ արարքը նախատեսված է «Վարչական իրավախախտումների վերաբերյալ» ՀՀ օրենսգրքի 169.1-րդ հոդվածի 2-րդ մասով, ուստի ղեկավարվելով նույն օրենսգրքի 32-րդ հոդվածի 2-րդ մասով, 244.2-րդ, 281-րդ հոդվածներով և 282-րդ հոդվածի 1-ին կետով ՀՀ ԿԱ ՊԵԿ աշխատակազմի իրավաբանական վարչության պետի կողմից 03.05.2016թ-ին ընդունվել է վարչական իրավախախտման գործի վերաբերյալ թիվ 318416/09 որոշումը (այսուհետ նաև Որոշում), որով Գևորգ Մանուկյանը ենթարկվել է վարչական պատասխանատվության՝ գումարով 20.000 դրամի չափով:

«Եկամտային հարկի մասին» ՀՀ օրենքի 1-ին հոդվածի համաձայն՝ սույն օրենքը կարգավորում է Հայաստանի Հանրապետությունում եկամտային հարկի որոշման և վճարման հետ կապված հարաբերությունները, սահմանում է Հայաստանի Հանրապետությունում եկամտային հարկ վճարողների շրջանակը, եկամտային հարկի դրույքաչափերը, հաշվարկման և վճարման կարգը:

Նույն օրենքի 13-րդ հոդվածի 2-րդ մասի 2-րդ կետի համաձայն՝ հարկային գործակալները պարտավոր են յուրաքանչյուր ամսվա համար այդ ամսվան հաջորդող ամսվա 20-ից ոչ ուշ քաջառապես էլեկտրոնային եղանակով հարկային մարմին ներկայացնել եկամտային հարկի ամփոփ հաշվարկ:

Քննարկվող դեպքում «Հայկական Սահմանադրական Իրավապաշտպան Կենտրոն» ՀԿ տնօրեն Գևորգ Մանուկյանի կողմից «Եկամտային հարկի մասին» ՀՀ օրենքի 13-րդ հոդվածի 2-րդ մասով սահմանված ժամկետում էլեկտրոնային եղանակով չի ներկայացվել 2016թ. փետրվար ամսվա եկամտային հարկի և սոցիալական վճարի ամսական ամփոփ հաշվարկը, որի համար Որոշմամբ կիրառվել է «Վարչական իրավախախտումների վերաբերյալ» ՀՀ օրենսգրքի 169.1-րդ հոդվածի 2-րդ մասով նախատեսված պատասխանատվության միջոցը:

Հարկ է նշել, որ 2016թ. հունվար ամսվա եկամտային հարկի և սոցիալական վճարի ամսական ամփոփ հաշվարկը էլեկտրոնային եղանակով չներկայացվելու համար Գևորգ Մանուկյանը ևս ենթարկվել է վարչական պատասխանատվության՝ գումարով 10.000 դրամ: Նշված հանգամանքը հիմք է հանդիսացել ՀՀ ԿԱ ՊԵԿ աշխատակազմի իրավաբանական վարչության պետի 03.05.2016թ-ի թիվ 318416/09 որոշմամբ «Վարչական իրավախախտումների վերաբերյալ» ՀՀ օրենսգրքի 169.1-րդ հոդվածի 2-րդ մասով նախատեսված պատասխանատվությունն առավելագույն չափով կիրառելու համար:

Վերոգրյալից հետևում է, որ Գևորգ Մանուկյանի կողմից չեն ձեռնարկվել համապատասխան միջոցներ 2016թ. փետրվար ամսվա եկամտային հարկի և

սոցիալական վճարի ամսական ամփոփ հաշվարկը էլեկտրոնային եղանակով ներկայացվելու ուղղությամբ: Մասնավորապես, նրա կողմից նախապես պետք է պարզաբանվեին հաշվետվություններն էլեկտրոնային եղանակով ներկայացնելուն խոչընդոտ հանգամանքները և տրվեին համապատասխան լուծումներ: Բացի այդ, վերոգրյալ հաշվարկը կարող էր ներկայացվել լիազորված անձի միջոցով (ինչը որ կատարվել է մարտ ամսվա հաշվարկը ներկայացնելիս), որի արդյունքում գանգատաբերը կխուսափեր վարչական պատասխանատվության ենթարկվելուց:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի և «Մաքսային ծառայության մասին» ՀՀ օրենքի 37-րդ հոդվածի պահանջներով Հանձնաժողովը

ո Ր Ո Շ ՈՒ Մ Է՝

ՀՀ ԿԱ ՊԵԿ աշխատակազմի իրավաբանական վարչության պետի 03.05.2016թ. թիվ 318416/09 որոշումը թողնել անփոփոխ, իսկ գանգատը՝ մերժել:

Սույն որոշմանը չհամաձայնվելու դեպքում այն ուժի մեջ մտնելու օրվանից երկու ամսվա ընթացքում կարող է բողոքարկվել տեսչական մարմինների միասնական բողոքարկման հանձնաժողով կամ ՀՀ վարչական դատարան:

Հանձնաժողովի նախագահ՝



Վ.ՄԻՐՈՒՄՅԱՆ